

Inspirasi kisah Nurly dan al-Quran

SAUDARA PENGARANG,

MUTAKHIR ini, media sosial dibanjiri dengan kisah mahasiswi Universiti Pendidikan Sultan Idris (UPSI), Nurly Shahirah Azman. Arwah meninggal dunia bersama 14 pelajar UPSI lain dalam nahas di Gerik, Perak pada 9 Jun lalu.

Kematiannya mendapat perhatian kerana terserlah pelbagai tanda kemuliaan yang Allah anugerahkan kepadanya kerana mencintai al-Quran.

Kisah Nurly tidak harus dibiarkan begitu sahaja, kisahnya harus menjadi inspirasi buat kita dalam melakukan transformasi sikap terhadap al-Quran.

Ini kerana al-Quran merupakan sumber utama untuk mendapat hidayah Allah yang dapat menyelamatkan kita di dunia dan akhirat.

Untuk melakukan transformasi ini, kita perlu bermula dengan menukar cara kita 'memandang' al-Quran.

Ia tidak sepatutnya dibaca seperti buku karangan manusia sebaliknya dihayati dan diberi respons ketika membacanya.

Contohnya, ketika membaca ayat tentang keindahan syurga kita perlu berhenti sejenak dan berdoa kepada Allah agar memasukkan kita ke dalam syurga.

Dalam melakukan transformasi, setiap Muslim perlu mengutamakan al-Quran dalam aktiviti harian. Ini dapat dilakukan jika kita melihat al-Quran sebagai panduan hidup untuk kebahagiaan di dunia dan akhirat.

Justeru, al-Quran perlu dijadikan sahabat yang sangat kita kasihi. Pada hari kiamat, di saat semua manusia memerlukan seseorang yang dapat menemaninya, al-Quran akan datang sebagai sahabat.

Seterusnya, perasaan tidak layak mendapat hidayah Allah kerana tidak pandai membaca al-Quran juga perlu dibuang

jauh-jauh. Allah memberi hidayah kepada sesiapa yang dikehendakiNya melalui al-Quran.

Kita menyaksikan ramai hamba Allah yang dahulunya bergelumbang dosa berubah menjadi insan soleh kerana tersentuh oleh ayat al-Quran.

Perasaan kasih sayang mendalam terhadap al-Quran perlu ditanam dalam diri setiap Muslim di samping keinginan kuat untuk mendapat hidayah Allah. Inilah yang berlaku kepada Nurly.

Sikapnya yang sentiasa membaca, menghafaz dan menulis al-Quran harus jadi inspirasi buat kita. Kita perlu berusaha memperbaiki hubungan dengan al-Quran. Ini kerana balasan Allah sangat lumayan dan terbukti dalam kisah Nurly Shahirah!

**DR. SYED SULTAN BEE
PACKER MOHAMED**
Universiti Utara Malaysia



ORANG ramai melihat al-Quran tulisan tangan Allahyarham Nurly Shahirah (gambar kecil) yang diletakkan di hadapan rumah keluarganya di Kampung Gong Pasir, Kerandang, Besut.